



**Müellif:** Akşehirli Mustafa

**Dergi:** Beyânülhak

**Tarih:** 7 Şaban 1330

2- Mevzubahis olan eser-i mezbûrda muârızımızın sözlerinde hakk ve hakikate muvâfık hiçbir delîl veya davâya tesâdüf edemediğimizden muârızımızın iddiâ-yı hakşinâsîliğindeki tekîdât ve teklîfâtına rağmen delîllerinin pek çoğunu bir mahâret-i kâmile ile yazılmış egâlît-i avâm-firîbâne veyahut pesendâne olmak üzere telakkî ederiz.

Sırası geldikçe bunlara tamamen işâret edileceğinden şimdilik yalnız bir tenbîh olmak üzere kârilerimizin nazar-ı dikkatlerini celb ile iktifâ ederiz. Muârızlarımızla tam bir mübâhase-i mütekâbile edebilmek ancak mukâbele bi'l-misl yani mugâlata ile mümkün olabilir ise de mevki'-i mahsûsunda hâl-i zarûrete münhasır olan tarîk-i mezkûr ile uzun uzadıya uğraşmak meslek ve maksadımıza muvâfık olmamakla beraber hakikat hususunda ve erbâb-ı fazîlet nezdinde hiçbir kıymet ve ehemmiyeti olmayacağı gibi ancak hâl-i zarûret ve mukâbeleda dahî “□□□□ □□□□□□” düstûruna istinât edebileceği erbâbına hafî değildir.

Her ne ise bizim îrâd edeceğimiz delâil-i hakikiyye ve berâhîn-i yakîniyye akıl ve mantık miyârıyla mukâyese edilerek îrâd ve muârızlarımıza tefhîm hususunda dahî son derece itinâ ile îzâh-ı hakikat edeceğiz.

3- Esâs-ı bahse şürû' olunmazdan evvel vech-i mev'ûd üzere aşağıda istimâli ehemm olan bazı elfâzın me'ânî-yi hakikiyye-i matlûbelerini îzâh ve beyân etmek îcâp eder idiye de mevâzi'-i mahsûsasına ta'lîkan ve tatvîl ve imlâlden hazeran şimdilik îrâdından sarf-ı nazar olunmuştur.

Muârızlarımızın sözlerinden mevzubahis ve münâkaşa edeceğimiz sözler tamamen mû'terize içine alınacaktır. Ve nihâyetinde kitabın sahîfesine ve îcâbına göre satırına da erkâmla işâret vaz' olunacaktır. Ve bu hususta küçük veya büyük mevzubahis edeceğimiz mütâlaât umûm numaraya tâbi olarak erkâmla işâret olunacaktır.



4- Hakikat! Hakâyık-ı kudsiyye-i Kur'âniyyeden olan “اَللّٰهُمَّ صَلِّ عَلٰى سَيِّدِنَا مُحَمَّدٍ وَعَلٰى اٰلِهِٖ وَسَلِّمْ” el-âyet nazm-ı celîlinin tecellîgâhı olan ve eser-i ma'hûdun serâpâ bu nazm-ı celîle mâsadak olduğu ber-vech-i âtî delâil-i hakikiyye-i kat'iyeye müsteniden erbâb-ı îkân ve ashâb-ı iman nezdinde tam manâsıyla tecellî edeceği cihetle nazar-ı dikkat ve ibretle takîp eylemeleri bilhâssa rica olunur.

Nazm-ı celîlin hâsıl-ı manâsı cânib-i akdes-i ilâhîden olmayan kitaplarda birçok çürük ve bozuk sözler bulunur demektir ki eser-i ma'hûdun tam bu sırr-ı celîle mazhar olduğunu kemâl-i adl ve insâf ve fikr-i bî- taraf ile muhâkeme eden zevât katiyen yakînen anlayacaklardır.

5- Şerîat nazarında “iman” zarûrât-ı dîniyyeden olan şeylerin kâffesine inanmak olduğu gibi “küfür” de zarûrât-ı dîniyyeden olan şeylerden velev birisini olsun inkâr etmekle olur. Zarûrât-ı dîniyye demek, Hazreti Peygamber Aleyhisselâm'ın Cânib-i Celîl-i ilâhîden bize haber verdiği şeylerin gayr-i kâbil-i tevîl olanları demektir. Şimdi bir meseleyi Hazreti Peygamber bize haber verdiği yakînen malûm olur. Ve manâ-yı matlûba delâleti de vâzıh ve âşikâr olursa bunlar zarûrât-ı dîniyyeden olup bunlardan velev bir meselesini inkâr edenler şer'an tekfîr olunur.

Şimdi biz bu esâsa binâen, meselâ Cenâb-ı Hakk'ın vahdâniyyetini inkâr eden veya Hazreti Peygamber'in risâletini veyahut enbiyâ-yı kirâm aleyhim es-salâtü vesselâm hazerâtından birini veyahut kütüb-i ilâhiyyeden birini inkâr eden kimseleri tekfîr ederiz.

Ve bizim bu tekfîrle muradımız milel-i gayrimüslimeyi tahkîr veya onlara tecâvüz olmayıp belki kendi ihvân-ı dînimiz olan Müslümanları sû-i akîdeden himâye ve sıyânet etmektir. Bu manaya olan küfür, dînsizliğe şâmil olduğu gibi zarûrât-ı dîniyyemizden olan bazı mesâili inkâr edenlere de şâmidir ki hülâsa küfür demek şerîat nazarında dînsizlik manasına hâs değildir. Binâenaleyh, Teslîs itikâdında olanlara biz dînsiz demeyiz. Belki zarûrât-ı dîniyyeden olan bazı mu'tekadâtı inkâr ederler deriz. Onlar da tabîi bunu kabul ederler.

### **Harpûtizâde Akşehirli Mustafa**



**Hazırlayan :** Ömer Faruk Güneş

**Editör:** Muhammed Salih Yıldız

**Link:** [https://isamveri.org/pdfosm/D00524/1328\\_168/1328\\_168\\_MUSTAFA.pdf](https://isamveri.org/pdfosm/D00524/1328_168/1328_168_MUSTAFA.pdf)